

李文恭公遺集

李文恭公奏議卷十五目錄

湘陰李星沅石梧著

男

榛概編次

江督

恭報到兩江總督任摺子

附奏現在鹽務情形片子

附奏現在江海各口情形片子

奏明安徽廬鳳道係兒女姻親應請迴避摺子

李文恭公奏議

卷十五目錄

借給運船委員讓漕銀兩摺子

特參水師游擊白炳思摺子

附奏特參守備千把片子

揀員請升安東縣知縣摺子

附奏運判趙祖玉展限引

見片子

籌撥幫丁行月等米摺子

附奏並無京控咨交案件片子

動項補造風損撥船摺子

特參署安徽當塗縣知縣吳昌晉摺子

請

旨飭禁糧船回空夾帶蘆私摺子

特參候補鹽運判范守誠摺子

揀發營員摺子

淮南捐完海防經費歸還庫款懇請獎勵摺子

揀員請升碭山縣知縣摺子

江甯京口旂兵支餉修理官署兵房動用銀款摺子

請製軍裝估需銀款摺子

陳明校閱標兵及會演近省兩岸兵礮並定期出

省查驗礮隄礮兵摺子

附奏動用息銀添販買穀片子

附奏修理淮安府便民船片子

附奏運鉛人員請借讓漕銀兩片子

附奏整頓營務並考察江西二鎮片子

附奏整頓水師片子

附奏所轄三省七鎮才力片子

附奏覆陳泖湖設防片子

查閱江防事竣回省摺子

附奏周歷江防總度全局形勢片子

附奏勒休江陰營游擊程名彪片子

遵

旨籌防泖湖再行酌度情形摺子

附奏奉到

硃批勉勵片子

審擬迭劫案內首要各犯摺子

揀員調補南匯縣知縣摺子

附奏委署句容縣知縣片子

附奏遵

旨買米助賑片子

奏陳酌議現辦淮南鹽務章程摺子

附清單

恭報場屬秋收分數摺子

附奏訪拏官運夾私請將運判知事撤任片子

甄劾河工人員摺子

附奏河工情形請將淮揚徐州兩道對調片子

恭報到兩江總督任摺子

奏爲恭報微臣抵任接篆日期叩謝

天恩仰祈

聖鑒事竊臣於道光二十七年四月十八日交卸雲貴
督篆遵

旨卽赴兩江新任竝因道經本籍附懇

寬假省親恭摺

奏明在案一路水陸兼馳不敢稍有濡滯茲於六月

二十五日行抵江南省城旋准兼署總督江蘇巡撫_臣陸建瀛委員齎送兩江總督兩淮鹽政關防各一顆暨

王命旗牌文案等件前來_臣卽恭設香案望

闕叩頭祇領伏念_臣學質謏陋仰蒙

聖主特達之知拔諸詞曹陟諸臺吏茲復渥蒙

寵命調補兩江當遺大投艱之交切履薄臨深之懼天

良具在_臣職敢虧雖負荷非所堪卽捐糜無以報

惟三省繁難疲敝久在

宸鑒之中而一人耳目心思何如衆長之集旣勤求夫
盡已尤亟務於得人查江蘇安徽江西現任三撫
臣才識均遠出臣上河漕分仔鉅任提督首飭戎
行臣綜攝地方責無旁代謹當隨時隨處虛衷實
力相與商榷維持勉期文職得人如安民弭盜諸
務振刷積疲而鹽糧重困徐爲理武職得人如練
兵設防諸務挽回積弱而水陸要領密爲儲至居

安思危常視無事如有事卽審機擇要必求當然
於已然臣之任重之能而膺極重之任敢乞

鴻慈逾格

訓示詳頒俾一切次第設施服膺遵守感激

生成更無涯量再臣所過貴州湖南湖北各省雨暘應

候比戶恬熙均足上慰

聖懷所有微臣抵任接篆日期謹繕摺叩謝

天恩伏乞

皇上聖鑒謹

奏 道光二十七年六月二十九日具

奏奉

硃批一切盡力爲之以副朕得人甚難之苦衷也欽此

附奏現在鹽務情形片子

再查兩淮鹽課正額二百餘萬兩每年辦理

奏銷均分上下兩半造報現在下半催徵屆期止有
兩月尙欠完銀六十餘萬兩經臣嚴飭運司上緊
督催務令埽數全完以符

奏限至淮綱銷路莫大於楚西尤莫重於漢口湖北
應徵銀五十五萬餘兩湖南應徵銀二十二萬餘
兩向例湖南溢銷統歸湖北彙辦臣此次順道探

訪竝晤督臣裕泰面商查鹽船停泊數以千計鹽
祖存岸數以三四千萬計佔攔運本不少固由銷
路未暢亦商私腳私販私諸弊爲積年所不免當
合兩淮全局詳加體察設法疏通認真堵緝先節
浮費以輕成本次酌成法以利權宜總期同心整
理漸有起色藉以仰紓

宸注合併附陳謹

奏

硃批認真妥辦欽此

附奏現在江海各口情形片子

再江海各口節經前督臣分段勘辦設礮安兵布置均已周密惟上海互市近處腹心之間不可一日無備尤不可一事不密臣於夷情非所習而於轄境必爲防查善後案内

奏明各隄兵礮秋季輪應總督閱演臣現將本署要件上緊清釐卽當循照舊章親歷江海要隘校閱兵礮并有無變通之處悉心慎密通籌如能順道

清江河工大概亦當加意察看容再隨時據實上聞謹

奏

硃批覽欽此又於并有無變通至加意察看句旁奉硃筆連點如能順道清江句旁奉

硃批是

奏明安徽廬鳳道係兒女姻親應請迴避摺子

奏爲道員例應迴避恭摺奏祈

聖鑒事竊查例載外官有關繫刑名錢穀考核糾參者
外姻親屬中本身兒女姻親應令官小者迴避等
語臣仰蒙

恩命調任兩江總督統轄江蘇安徽江西三省查有安
徽廬鳳道周鳴鸞湖南舉人由湖北知縣洊升知
府以崇陽軍務出力

賞戴花翎復蒙

簡授今職與臣兒女姻親循例應行迴避緣江西江蘇

兩省皆臣所轄無可更調相應奏明請

旨敕部照例改掣一俟部覆到日卽行給咨前往除咨
明安徽撫臣先行委員接署外爲此恭摺具

奏伏乞

皇上聖鑒訓示謹

奏 道光二十七年七月初二日具

奏奉

硃批另有旨欽此內閣奉

上諭李星沅王植奏道員例應迴避各一摺安徽廬鳳
道周鳴鸞與現任兩江總督李星沅係兒女姻親著
卽迴避交該部議掣省分照例辦理所有安徽廬鳳
道員缺著舒夢齡補授欽此

借給運鉛委員讓漕銀兩摺子

奏爲借給運鉛委員讓漕銀兩恭摺奏祈

聖鑒事竊查前准部咨運鉛人員實因遭風沉溺以及
守壩讓漕等事請借銀兩必當查勘確實核計水
深丈尺及守讓各日期分別

奏明酌借所借之數不得浮於應銷之數竝經江省
議請按日計算如數在五百兩以內者應卽照數
給領倘守候日久仍照向借章程不得逾五百兩

之數其應借之銀須俟事竣方准請借等因在案
茲有貴州領解丙午年下運二起京鉛委員永從
縣知縣雙荃又湖北接運丁未年上運一起京鉛
委員襄陽糧捕通判德遠又貴州領解丁未年下
運二起京鉛委員都勻縣知縣郝松齡各因行抵
清河縣太平河地方適值重漕紛紛北上不容漫
越爭先又兼禦黃壩堵閉不能前進計已停泊五
十日核計每日食米鹽菜銀兩應領之數已在五

百兩以外各請借給讓漕銀五百兩等情稟經江甯布政使傳繩勛查明各該員讓漕住守日期請借之數與部咨新定章程尙無浮多詳請借給具奏前來臣查該員雙荃德通郝松齡領運京鉛因在清河縣境內停讓漕船各請借讓漕銀五百兩既經藩司查明住守日期請借銀數與部咨准借銀數相符除飭司於司庫道光二十六年雜稅款內借給各該員銀五百兩催令償運前進並咨黔省

於各該員應得養廉及報銷找領銀內扣繳造報
江省作正開銷暨咨部查照外理合恭摺具

奏伏乞

皇上聖鑒謹

奏 道光二十七年七月初二日具

奏奉

硃批該部知道欽此

特參水師游擊白炳忠摺子

奏爲特參水師遊擊巡緝無能意存推諉請

旨先行革職仍飭遵限勒拏恭摺奏祈

聖鑒事竊照江南洋面近丁盜劫風行業經兼署督臣

陸建瀛疊飭水師及地方官緝分畛域上緊緝

務獲竝將蘇松鎮總兵林明瑞狼山鎮總兵白陞

奏請議處欽奉

諭旨林明瑞白陞俱著降爲三品頂戴仍帶革職畱任

以示薄懲等因欽此臣查接管文卷及上海崇明寶山等縣稟報自六月十一日後商船米船在洋續多被劫勒贖之案盜犯仍無一獲閱之不勝憤恨復經咨商撫臣提臣竝飭催蘇松狼山福山三鎮暨省會浙省一體選派將弁會同迅速兜捕竝飭上海道督同委員妥籌添雇船勇護送船隻偵探盜踪以爲舟師之助因查狼山鎮標右營遊擊白炳忠迭奉會勘飭拏來稟每多推諉惟以失事洋

面舊圖不的汎境廣濶官少兵單爲詞其倔強支
離若明知事主不能確指而置重案於不問又逆
料文員不能詳勘而假妄論以自藏水師相率宴
安怠弛日久遇有海洋劫案輒先指東畫西規避
處分痼疾幾不可治白炳忠由守備遞拔歷任二
十餘年當此盜劫頻仍不思激發天良奮勇偵緝
有案必獲勉贖前愆乃於大海汪洋強爭界限空
文曉辨曠日愒時且已經勘定應歸狼山鎮標各

案未據獲犯一名祇以浮滑習成始終泄查實爲
溺職之尤亟須嚴參示戒除飛飭蘇松狼山兩鎮
照案會勘明確合力趕緊追拏及巡洋各職名查
取續行

奏參外相應請

旨將狼山鎮標右營遊擊白炳忠先行革職勒限一月
緝獲如再希圖推卸延不破案卽於海岸枷號兩
箇月以儆其餘謹會同江蘇巡撫臣陸建瀛江南

提督臣尤渤合詞恭摺具

奏伏乞

皇上聖鑒訓示謹

奏 道光二十七年七月初八日具

奏奉

硃批另有旨欽此內閣奉

上諭李星沅奏參水師遊擊巡緝無能請革職勒緝一摺江南狼山鎮標右營遊擊白炳忠於該管洋面盜

劫各案疊奉會勘飭拏輒敢飾詞推諉犯無一獲實
爲溺職之尤斷難寬縱白炳忠著先行革職勒限一
箇月緝拏倘再圖推卸延不獲案卽於海岸枷號兩
箇月以示懲儆該部知道欽此

又於請

旨將狼山鎮標右營遊擊白炳忠先行革職句旁奉

硃批是此等溺職水師員弁必當從嚴參辦慎勿寬縱

欽此

附奏特參守備千把片子

再據福山鎮總兵孫雲鴻稟稱崔天申金同泰季
福盛董永凝四船於六月初八等日在黑沙嘴余
山銅沙各洋面被盜劫擄之案查係蘇松鎮標右
營管轄洋面應請嚴參等情臣查沿海各口岸特
設水師將備會哨巡緝近以米船出洋復飭分途
保護乃劫案層見疊出爲向來所未有究竟會哨
何處巡緝何匪護送何船實屬玩縱已極若不嚴

加整頓洋面何由肅清應請

旨將專巡蘇鎮右營把總黃永升協巡外委徐正學分
巡中營守備張兆鯤一併暫行革職總巡左營遊
擊吳聯魁都司張鳳翔均摘去頂戴勒限一箇月
緝拏屆限無獲卽行撤任參辦福山鎮總兵孫雲
鴻職司統巡亦難辭咎請

旨交部議處仍責成該總兵會同蘇松鎮林明瑞親督
內外巡洋水師實力兜拏速獲究辦謹合詞附片

具

奏伏乞

聖鑒訓示謹

奏

硃批另有旨欽此內閣奉

上諭李星沅奏查明被劫洋面請將管轄各將弁懲處等語此案洋面被盜劫擄查係蘇松鎮標右營管轄所有疎防專巡蘇鎮右營把總黃永升協巡外委徐

正學分巡中營守備張兆鯤著一併暫行革職總巡
左營遊擊吳聯魁都司張鳳翔均著摘去頂帶仍俱
勒限一箇月緝拏屆限無獲卽行撤任參辦福山鎮
總兵孫雲鴻職司統巡亦難辭咎著交部議處仍責
成該總兵會同蘇松鎮總兵林明瑞親督內外巡洋
水師實力兜擒迅速究辦該部知道欽此

揀員請升安東縣知縣摺子

奏爲揀員請升沿河沿海要缺知縣以裨地方恭摺
奏祈

聖鑒事竊照安東縣知縣屠元瑞與山安同知譚祖同
姻親迴避業經

奏明開缺在案所遺安東縣缺例應在外揀選調補
該縣濱臨河海一切彈壓巡防在在均關緊要必
須精明幹練熟習河務之員方足以資治理臣等

與藩臬兩司於現任簡缺知縣及候補正途各員
內逐加遴選一時實無合例調補之員惟查有淮
安府經歷龔舫年五十一歲安徽建平縣廩貢生
肄業國子監期滿以訓導候選遵武陟例分發本
省試用因安徽通志告竣

奏奉

上諭准其交部歸於訓導班內遇缺儘先銓選欽此旋
補常州府陽湖縣訓導俸滿保薦復選今職道光

二十年十二月到任嗣因代理山陽縣任內督率紳士倡捐團練出力二十三年

奏奉

上諭著以沿河知縣升用欽此覆查該員辦事安詳留心河務以之升補安東縣知縣洵堪勝任惟安東縣係屬調缺今以府經歷請升與例稍有未符第人地實在相需例得專摺具

奏據藩臬兩司會詳前來臣等往返札商意見相同

合無仰懇

天恩俯念員缺緊要准以龔舫請升安東縣知縣實於
要缺有裨如蒙

俞允俟部覆至日給咨送部引

見恭候

欽定再該員任內竝無違礙參罰一切因公處分遵例
毋庸核計該員係初升知縣所有應完罰俸銀兩
飭令照數完繳造冊咨銷所遺淮安府經歷江省

現有應補人員容另遴員請補臣李星沅到任未
及三月例不加考此摺係臣陸建瀛出考合併陳
明謹會同江南河道總督臣潘錫恩合詞恭摺具
奏伏乞

皇上聖鑒訓示謹

奏 道光二十七年七月初八日具

奏奉

硃批另有旨欽此內閣奉

上諭李星沅等奏揀員請升沿河沿海要缺知縣一摺
著照所請江蘇安東縣知縣員缺准其以龔舫升補
照例送部引見該部知道欽此

附奏運判趙祖玉展限引

見片子

再兩淮通州分司運判趙祖玉十年俸滿奉部調
取引

見自應委員接署以便交卸請咨惟查前因通屬各場
垣商半皆歇業竈鹽無售設法官收飭委該運判
具領庫貯閔款銀六萬四千七百兩督同場員收
買以蘇竈困俟鹽運出場按引繳還庫本現在次

第籌辦計須半年以上方能運竣繳完未便遽易
生手據藩運兩司詳請展限前來除批飭一俟事
竣卽行詳請給咨赴部外謹會同江蘇巡撫臣陸
建瀛附片具

奏伏乞

聖鑒謹

奏

硃批吏部知道欽此

籌撥幫丁行月等米摺子

奏爲幫丁行月等米緩缺不敷支放循例籌撥濟用
恭摺奏祈

聖鑒事查接管卷內據江安督糧道沈兆澐會同江甯
布政使傅繩勛蘇州布政使李德安徽布政使蔣
文慶詳稱江淮興武二衛各幫及鳳陽各幫長淮
頭幫應支道倉月糧米石向於各屬徵解南撫米
內派支今道光二十六年分各屬額解道倉南撫

米內銅陵東流和州上元江浦六合等州縣被歉
共計緩徵米六千八百三十石九斗四升六合八
勺加以道倉歲額不敷除減船減支外仍應籌補
米六千五百石六斗八升三合五勺又鳳陽長淮
泗州大河淮安江淮興武等衛各幫二十六年分
現減丁船應支州縣月糧災緩不敷派支米三千
五百四十石九斗八升三合八勺通共缺米一萬
四十一石六斗六升七合三勺內除江興各幫道

光二十一年冬減船借支四成月糧原動江浦縣
二十一年分漕糧派支據請分限扣還於二十六
年分道倉月糧項下扣抵米一百一十八石九斗
二升又改本行糧項下扣抵米三百九十一石二
斗又原撥當塗縣道光十九年分緩漕派支江興
各幫減船借給月糧扣抵米一百一十九石二斗
又道光二十五年分撥漕案內寬撥天長縣嘉慶
十二年分緩漕正贈米二十石七斗七升九合六

勺五抄均應留爲道光二十六年分道倉災缺抵
支實共緩缺不敷米九千三百九十一石五斗六
升七合六勺五抄查有江甯揚州淮安通州松江
常州鎮江廬州等府州屬常平倉穀堪以酌撥穀
二萬石照二穀一米之例碾抵米一萬石以爲道
倉災缺之用分別提解派支計仍多穀碾米六百
八石四斗三升二合三勺五抄續據六合縣詳報
欠解道倉道光二十五年分熟田撫米因災緩徵

移查確實應行籌補米三千六十六石五斗五升
三合六勺除以前項多餘穀碾米儘數抵支仍不
敷米二千四百餘石業經移司籌補足數另於下
年撥漕案內再行一併入數詳

奏所有動碾常平倉穀統俟銅陵等州縣帶徵災緩
南撫行月等米按限分別催徵歸還常平倉備貯
並將支給米數另於該年奏銷冊內分晰造報等
情會詳請

奏移交前來臣查幫丁行月等米均計口授食要需
今旣緩缺不敷自應循例籌撥相應請

旨將江甯揚州淮安通州松江常州鎮江廬州等府州
屬常平倉穀照數撥足以濟支放俟銅陵等州縣
帶徵灾緩南撫行月等米按限分別催徵歸還備
貯另於該年奏銷冊內造報謹會同漕運總督臣
楊以增江蘇巡撫臣陸建瀛安徽巡撫臣王植恭
摺具

奏伏乞

皇上聖鑒訓示謹

奏 道光二十七年七月初八日具

奏奉

硃批另有旨欽此內閣奉

上諭李星沅奏幫丁行月等米緩缺不敷支放循例撥濟一摺幫丁行月等米均關計口授食現據該督奏稱不敷支放自應循案撥給著照所請准其將江甯

揚州淮安通州松江常州鎮江廬州等府州屬常平
倉穀酌撥穀二萬石以濟支放仍俟銅陵等州縣帶
徵災緩南撫行月等米按限分別催徵歸還備貯另
於該年奏銷冊內造報餘著照所擬辦理該部知道
欽此

附奏竝無京控咨交案件片子

再查京控咨交案件每屆半年例應查明有無承審提解遲延職名分別具

奏茲屆二十七年上半年彙奏之期據江甯布政使傅繩勛查明詳報前來臣查接管卷內上屆奏報截至道光二十六年十二月底止尙有未結海門廳民陳琢山暨阜甯縣試用訓導王長齡二起已據常鎮道姚熊飛江甯藩司先後審詳均經兼署

督臣陸建瀛分別核咨完結並無續准之案今截至道光二十七年六月底止查無京控咨交未結案件理合附片具

奏伏乞

皇上聖鑒謹

奏

硃批知道了欽此

動項補造風損撥船摺子

奏爲勘明撥船運料風損循例動項補造仰祈

聖鑒事竊照裡河外南二廳經管關撥船各一百隻在
於黃運兩河常川撥糧運料遇有風損向係隨時
查明取結專案咨部一面發銀補造工竣造冊咨
銷前准部咨嗣後修造撥船務須比較近年損船
最少之數據實請銷並飭將近年前後請修隻數
隨案聲明以憑稽考又准部咨補造風損撥船銀

數在五百兩以上者奏明後再行咨部辦理各等
因遵照在案茲臣李星沅查接管卷內據河庫道
陳熾前任淮揚道樊師仲會詳稱裡河廳船夫徐
得等撥船十二隻外南廳船夫趙林等撥船十隻
實係道光二十五年撥運柴料先後行至禦黃壩
高家馬頭黃河中流遭風損壞板片柴料漂失無
存照例飭行該管廳縣汛員勘驗結報將風損船
隻字號花名開摺送道覆查屬實並無捏混情事

所有每隻照依原造減准工料銀一百六十一兩九錢六分二釐九毫以上兩廳共船二十二隻通共需銀三千五百六十三兩一錢八分三釐八毫卽請發辦歸額應用開摺具詳前兼署督臣陸建瀛未及其

奏移交前來臣等伏查前項風損撥船二十二隻既據該管廳縣汛員勘驗結報並經該道等查無捏混應請准其照例補造以濟撥運所需工料銀兩

在於河庫撥船生息本款銀內動給飭令趕辦完
整除將送到風損船隻字號花名清摺聲明上屆
各年風損隻數隨案咨部並飭另行取造冊結分
案詳咨外所有勘明補造船隻緣由謹合詞恭摺
具

奏伏乞

皇上聖鑒敕部核覆施行謹

奏 道光二十七年七月初八日具

奏奉

硃批工部議奏欽此

特參署安徽當塗縣知縣吳昌晉摺子

奏爲特參娶娼爲妾之知縣請

旨卽行革職提同審辦以儆官邪恭摺奏祈

聖鑒事竊據江南鹽巡道詳稱署安徽當塗縣知縣吳

昌晉先後被俞張氏及職員李雲巢呈控串拐俞

喜齡爲妾并吳昌晉稟道剖辨批飭江甯府縣傳

案訊究據俞張氏供孫女喜齡曾經受聘李姓因

貧賣娼二十六年九月十八日有凌鴻泰們同吳

昌晉把喜齡接去未回次日往尋凌鴻泰止說錢
票在縣令氏具領氏卽赴府控告後經吳昌晉之
弟吳小卿始行說合價賣等語又據李雲巢供姪
子李有年曾聘俞喜齡爲婦後來訪明作妓原想
退婚等語當令兩面質對俞張氏與李雲巢素不
認識李雲巢頗覺詞窮復查吳昌晉原稟并遣丁
續遞親供據云妓女喜齡名在秦淮艷史職母寄
居江甯去秋生辰招女清音宴客遂爲喜齡贖身

因俞二兩次措勒付銀一千二百兩并鈔粘身契
一紙載明賣爲側室李姓聞風架控俞二勾串捏
名卽求徹底根究查吳昌晉係安徽試用知縣李
雲巢係議敘八品銜應請分別札調咨革確審由
道轉詳前來臣以李雲巢自稱職員輒行冒認妓
親捏情具控斷非安分之徒吳昌晉現任職官忝
膺民社應如何謹飭自愛乃敢娶娼爲妾恬不知
羞轉謂其母王婚尙未送署查上年九月該員奉

差來甯文卷具在卽俞張氏亦供該員親至其家
接去喜齡其鸛歸過於親託名狡飾已可概見且
查妓女喜齡彼時曾經赴縣呈請從良及楊勝氏
湊錢二百串繳作喜齡身價願卽領回擇配又曾
強令俞張氏先行赴縣領錢難保非該員倚官勒
買詭計主持荒謬固無可辭刁詐尤不可問亟應
一併革審以儆官邪除將李雲巢議敘執照追取
咨部斥革外相應請

旨將知州銜原署安徽當塗縣試用知縣吳昌晉卽行
革職委員押解來省提同全案人證由臣督飭江
甯藩司確切嚴審照例定擬謹會同江蘇巡撫臣
陸建瀛安徽巡撫臣王植合詞恭摺具

奏伏乞

皇上聖鑒訓示謹

奏
道光二十七年七月二十日具

奏奉

硃批另有旨欽此內閣奉

上諭李星沅奏請將知縣革職審辦一摺知州銜原署
安徽當塗縣試用知縣吳昌晉以現任職官買娼爲
妾實屬不知自愛且難保無倚官勒買詭計主持情
事吳昌晉著卽革職交該督嚴審確情照例定擬具
奏該部知道欽此

請

旨飭禁糧船回空夾帶蘆私摺子

奏爲糧船回空夾帶蘆私請

旨飭卽嚴禁恭摺奏祈

聖鑒事竊查江廣各省軍船由通州交卸歸次丁舵水
手每因蘆鹽價值賤於淮南勾串風客隨幫販運
盈千累萬除本分肥甚至梟匪入夥肆行無忌大
爲淮綱之害伏讀道光十年欽奉

上諭軍船帶私之弊以江廣爲最其透漏鹽劬之弊以天津爲最與其搜獲於旣帶之後不若嚴禁於未帶之先等因欽此嗣據前督臣陶澍節次奏奉

諭旨通飭查辦歷經照舊遵行惟近日淮南綱鹽漢西各岸銷數益形短絀年復一年其受病不止帶私而帶私尤著卽帶私不止空運而空運較多關天津鹽商利於售私糧船停泊時在公埠交易其附近天津地面如青縣靜海滄州南皮等處臨河商

店亦多私鹽窩留專候迎船上載不於此首先禁絕若輩既費資本護私必堅來源未清去路叢雜淮綱壅滯疏暢愈難卽空運沿路遷延展轉售賣於漕務極有關係相應請

旨勅下長蘆鹽政嚴切示禁各場店於軍船回空例買食鹽以外不准顆粒運售有犯卽懲以杜夾私之由臣仍飛咨漕臣加意嚴查防範不准弁丁勾結稍有夾帶竝咨會直隸督臣山東撫臣檄飭沿河

營縣一體堵截查拏俟入江南地界臣卽選派文武大員迅速迎查兼防河北透私竝於楊莊勾水起卸渡黃後自揚州駛出瓜口沿江洲汊各關隘逐段搜查務盡勒催儼行以期仰副

皇上廑念鹽漕之至意謹繕摺具

奏伏乞

聖鑒訓示謹

奏
道光二十七年七月二十日具

奏奉

硃批所奏好另有旨欽此內閣奉

上諭李星沅奏請嚴禁糧船回空夾帶蘆私一摺軍船回空例有食鹽若勾串售私隨幫販運不惟淮綱壅滯卽沿路展轉售賣空運亦多遷延於鹽漕均有關係著飭爾經額沈拱辰嚴禁各場店於軍船回空例買食鹽無得額外運售不特出示禁革竝著常川梭查有犯卽懲以肅漕政而利漕行餘著照所擬辦理

欽此

特參候補鹽運判范守誠摺子

奏爲鹽運判妄希補缺冒昧具稟請

旨降補鹽大使以示薄懲恭摺奏祈

聖鑒事臣查接管卷內有兩淮運司請補泰州分司詳

文一件又該運司據候補運判范守誠兩次稟請

部示詳文一件又該運判自行請咨部示銜稟一

件竝准前兼署督臣陸建瀛咨稱范守誠於鹽政

籤查運司未復時一再具稟爭執殊屬不安本分

移交核辦前來臣逐加檢閱據范守誠原稟道光二十二年由浙省捐輸鹽運判奏明儘先補用旋經部議改歸本班到班補用此後層層積壓試用永無到班之日卽無補缺之日將陝甘捐輸新例及道光二十三年部議專條比附援引現在泰州分司一缺稟請先行咨部再行遴補等語又據運司詳查范守誠應俟捐納本班到班方准先用例有明文泰州分司一缺無論作何計算總未輪捐

班到班應否咨請部示一併據情轉詳等語臣查各項官員自有補缺班次章程具在先後井然如鹽務各缺應由運司查明詳補鹽政核明

題補仍由吏部議定准駁奉

旨遵行非例涉兩歧確有疑義均無庸遽請部示徒煩文牘該員范守誠旣知捐班到班始准先用又經運司批示明晰乃復援案牽混曉辨不休且徑赴督撫衙門率行具稟向來無此體制兩淮候補人

數多至二百餘員流品不齊趨向各別遇有補缺
委署動輒鬥捷爭先不可不持正從嚴挽回風氣
除將泰州分司一缺批飭運司照例遴員詳補外
相應請

旨將候補鹽運判范守誠以鹽大使畱淮降補用示薄
懲臣仍督同運司隨時詳加考察如有鑽刺取巧
串商牟利之員卽行據實參究斷不敢稍事姑容
謹繕摺具

奏伏乞

皇上聖鑒訓示謹

奏 道光二十七年七月二十日具

奏奉

硃批所辦甚是另有旨欽此內閣奉

上諭李星沅奏運判妄希補缺冒昧具稟請降補示懲
一摺所辦甚是各項官員補缺班次例有明文兩淮
候補鹽運判范守誠於本班竝未到班援案牽混曉

辨不休且徑赴督撫衙門率行具稟尤屬有乖體制
范守誠著以鹽大使降補畱於兩淮以示懲儆該部
知道欽此

揀發營員摺子

奏爲循例請

旨揀發營員以資差委恭摺奏祈

聖鑒事竊查兩江幅員廣袤營汛較繁且多沿海沿江
巡防尤關緊要道光二十四年前督臣壁昌奏請
揀發武職各員業已次第補缺遇有委署差遣人
數實屬不敷現當整飭營務尤須加意遴選不可
不儲材備用相應循例請

旨勅下部臣於曾任實缺曾經出師在部候補候選各員內揀發參將二員遊擊三員都司三員來江差委俟有相當缺出酌量請補理合恭摺具

奏伏乞

皇上聖鑒訓示謹

奏
道光二十七年七月二十日具

奏奉

硃批另有旨欽此內閣奉

上諭李星沅奏請揀發參將二員遊擊三員都司三員
赴江南差遣著兵部於曾任實缺曾經出師及在部
候補候選人員內照例揀選帶領引見欽此

淮商捐完海防經費歸還庫款懇請獎勵摺子

奏爲淮商捐完海防經費銀兩歸還庫款先將已完
各商循案懇

恩獎勵以昭激勸仰祈

聖鑒事竊照道光二十年淮南商人包振興等公捐防
堵經費銀五十萬兩請於運庫雜款項下墊解由
該商等自辛丑綱起至癸卯綱止按引帶納還款
所捐銀兩除撥還運庫及江甯蘇州兩藩庫動支

防堵各款外餘俱解交蘇州藩庫經前署督臣裕謙奏奉

諭旨賞收又二十二年該商等續請公捐銀五十萬兩仍於運庫籌墊俟前項完清卽按三綱完繳所捐銀兩解交上海道局支用又經前督臣牛鑑奏奉上諭著卽賞收該商人等情殷報効好義急公殊堪嘉獎著該督開列名單具奏候朕施恩等因欽此當經前督臣等先後札行鹽運使欽遵轉飭在案茲查

接管卷內據鹽運使但明倫詳稱道光二十年二十二年淮南商人兩次公捐銀一百萬兩又續捐銀一百萬兩先後共捐經費銀二百萬兩內續捐銀一百萬係自二十二年起至二十六年止陸續報完業經分作三次開單奏請獎勵所有二十年二十二年兩次捐銀一百萬兩現在已據各商完繳銀七十三萬七百九十九兩五錢三分九釐該商等按引完納咸知急公並有於引鹽未運之前

先行按數投完者應請援案將已完各商開呈各員名履歷先行獎敘其餘未完銀兩嚴催完納一俟全完另再請獎等情具詳移交前來臣查淮南道光二十年二十二年共捐防堵經費銀二百萬兩除續捐銀一百萬兩業經前督臣耆英壁昌先後分作三次

奏請獎敘在案其該商等二十年二十二年兩次呈請捐銀一百萬兩係屬分綱按引完繳若俟全完

後再行請獎則前此各商早經優敘現捐各商未免向隅且以後應繳之銀恐滋觀望查已完銀數核計已踰十分之七各商投完較早報効維殷應卽援照成案先請甄敘合無仰懇

聖主恩施給予獎勵以昭激勸謹將已完各商請獎員名開具清單恭呈

御覽除另冊咨部查照外臣謹會同江蘇巡撫臣陸建瀛合詞恭摺具

奏伏乞

皇上聖鑒訓示再各商已完銀七十三萬七百九十九兩零應請全數歸還通庫前墊之款合併陳明謹奏
道光二十七年八月初六日具

奏奉

硃批該部議奏單併發欽此

揀員請升碭山縣知縣摺子

奏爲揀員請升沿河要缺知縣恭摺具奏仰祈

聖鑒事竊照碭山縣知縣王慶瑞具報丁憂所遺碭山

縣知縣係繁疲難沿河要缺例應在外揀選調補

該縣界連東省民情獷悍必須精明幹練之員方

克勝任臣等與藩臬兩司於通省現任簡缺及候

補知縣內逐加遴選一時調補乏員惟查有碭山

縣縣丞丁瑞徵年五十五歲順天大興縣人由從

九品加捐縣丞投効南河道光十二年咨署阜甯
縣糧河縣丞十三年丁憂回籍服滿起復到工咨
署碭山縣縣丞十八年三月到任俸滿保薦奉

旨准其卓異升用委署碭山縣知縣臣等覆查該員才
具穩實熟習修防以之升補碭山縣知縣洵堪勝
任且係保薦准升之員與例亦屬相符據藩臬兩
司會詳請

奏前來合無仰懇

天恩俯准以碭山縣縣丞丁瑞徵升補碭山縣知縣實
於河工地方均有裨益如蒙

俞允俟部覆至日給咨送部引

見恭候

欽定再該員任內竝無違礙參罰一切因公處分例免
核計查係初次請升應完罰俸銀兩飭卽照數完
繳造冊咨銷所遺碭山縣縣丞員缺咨另遴員請
補合竝陳明謹會同江南河道總督臣潘錫恩合

詞恭摺具

奏伏乞

皇上聖鑒訓示謹

奏 道光二十七年八月初六日具

奏奉

硃批另有旨欽此內閣奉

上諭李星沅等奏揀員升補沿河要缺知縣一摺著照所請江蘇碭山縣知縣員缺准其以丁瑞徵升補照

例送部引見該部知道欽此

江甯京口旂兵支餉修理官署兵房動用銀款摺
子

奏爲江甯京口八旂官兵借支俸餉銀兩修理官署
兵房動用銀款恭摺奏祈

聖鑒事竊臣准江甯將軍裕瑞等咨道光二十七年六
月二十七日欽奉

上諭穆騰額等奏請借俸餉修理官署兵房一摺江甯
京口駐防官署兵房旣據該署將軍會商該署督陸

建瀛委員確查實係塌卸損壞自應及時修理者准其援照成案江甯協領等共借俸餉銀一萬九千八百四十兩領催前鋒等共借餉銀九萬五千六百八十八兩京口官員共借俸銀七千九百二十兩兵丁共借餉銀三萬六千一百二十兩准其動借飭令江甯江蘇兩藩司在於各該官兵額支俸餉銀內分作八年按季按月坐扣還欸惟該省官兵尙有道光二十二年減半請借之銀截至本年六月江甯官兵未

扣完銀四萬七千五百五十三兩零京口官兵未扣
完銀一萬八千一百三十八兩零著卽在現借俸餉
內按數先行劃扣以清款項等因欽此當經轉行欽
遵籌款動解去後茲據江甯布政使傅繩勛詳稱
江甯八旂官兵修理署房共請借俸餉銀一十一
萬五千五百二十八兩在於司庫動撥灾借兵餉
銀一萬四千兩八旂扣回修房銀五萬八千兩驛
站建剩銀六千七百兩鍾承露代賠伊父工程核

減銀五百兩江巡道黃快宣樓船舊料變價銀六
百兩賞卹餘剩銀五百兩部借養廉銀一千兩文
武各官罰俸銀二千八百兩漕價銀三萬一千四
百二十八兩以上共符請借之數除道光二十二
年所借銀兩截至本年七月底止仍欠銀四萬六
千五百六兩五錢按數扣還外計餘銀六萬九千
二十一兩五錢解交旂營驗收此項借款官員卽
從二十七年秋季起扣驍騎校及兵丁均從本年

八月起遵限按季按月坐扣歸款竝據蘇州布政使李德詳稱京口蒙古官兵共借俸餉銀四萬四千四十兩照案在於司庫耗羨減半平餘款內動借至道光二十二年請借銀兩截至二十七年秋季止尙有未完銀一萬六千七百六十二兩五錢在於現借銀內扣還實應找借銀二萬七千二百七十七兩五錢卽於現存耗羨減半平餘款內借給興修其應放抵還款銀一萬六千七百六十二

兩五錢俟收有減半平餘銀款隨時陸續歸還至
所借銀兩查照原奏分作八年按季按月在於該
官兵應得俸餉銀內分別扣還歸款詳請循例具
奏前來除飭照數動解給修暨移咨將軍等督飭認
真修理外所有動借江蘇兩藩庫銀款緣由謹會
同江蘇巡撫臣陸建瀛循例恭摺具

奏伏乞

皇上聖鑒謹

奏 道光二十七年八月初六日具

奏奉

硃批另有旨欽此內閣奉

上諭李星沅奏江甯京口八旗官兵修理官署兵房借
動銀款一摺江甯京口駐防官署兵房前經降旨准
照成案借支俸餉修理茲據該督查明借動各款除
將前借未清銀兩均於此次應借銀款內各按數扣
還外其餘裁借銀兩著卽照數在江蘇兩藩庫內支

給務卽飭令認真修理所借銀兩仍遵前旨分作八
年在該官兵應得俸餉內分別扣還歸款餘著照所
擬辦理該部知照欽此

請製軍裝估需銀款摺子

奏爲請製逾限軍裝估需銀款循例具奏仰祈

聖鑒事竊照向來各省動支司庫錢糧銀數在千兩以上者例應隨時

奏明辦理茲據蘇州布政使李德詳稱提標中左前後城守五營請製鉞斧藤牌牌刀旂幟帳房等項軍裝查明上屆均於乾隆嘉慶年間製造久逾保固例限損壞不堪應行修製由署婁縣知縣王清

渠勘明具結呈送委據署松江府知府洪玉珩會同福山鎮標中營遊擊劉長清覆加確勘竝經飭委太湖水師副將顧清漣勘明實係逾限損壞應行製造各具勘結由營按例估計造具冊結移司核辦所有冊估工料除舊料變抵外實估需工料銀一千三十九兩六錢五分八釐請於司庫正項朋扣等款銀內動給製辦詳請具

奏前來臣查提標中左前後城守五營請製各項軍

裝旣據太湖水師副將顧清漣署松江府知府洪
玉珩福山鎮標中營遊擊劉長清遞加勘驗均係
逾限損壞自應准其動項製造以資操演而實軍
儲仍俟工竣飭委大員前往核實點驗如有草率
偷減情弊卽將承辦之員嚴參著賠除飭取造估
計冊結照例詳辦並將各項軍裝上屆修造年分
另繕清單咨部查照外所有請製逾限軍裝估需
銀款緣由理合循例具

奏伏乞

皇上聖鑒敕部核覆施行謹

奏 道光二十七年八月初六日具

奏奉

硃批該部議奏欽此

陳明校閱標兵及會演近省兩岸兵礮竝定期出
省查驗礮堤礮兵摺子

奏爲校閱省標官兵及會演附近之五龍山沙洲圩
兩岸兵礮卽行定期出省查驗沿江礮堤閱演前
後路礮兵恭摺具

奏仰祈

聖鑒事竊臣蒙

恩調補兩江統轄三省營務責成綦重整飭維殷抵任

李文恭公奏議

卷十五

江督

五

後卽經通飭各鎮協標營所有槍礮馬步箭及刀
矛雜技必須勤加操演一律精純不准花法節觀
惟當實用儲備竝於臣署箭道照作田埂小路就
省標分起傳操點放連環槍礮隨時親督教演茲
於七月二十九八月初一二三等日調集督標中
左及城守左右四營官兵前赴校塲先演三才百
勝諸陣次閱擡礮鳥槍打靶及馬步箭準頭竝藤
牌矛桿刀法步伍均各整齊技藝亦尙合法槍礮

中數計在七成以上當經分別捐賞擇尤獎拔其
未臻嫻熟者勒限勤操惟督標中營把總趙廷爵
江甯城守右營把總宋文標演礮生疎均卽降爲
外委督標左營把總葛昌霖箭射無準亦卽降爲
額外以觀後效又督標中營候補千把總武舉杜
坤陳永昇効力武舉劉夢熊臨演槍礮未經預備
均卽革退隨營竝據該管將備當場揭報前來臣
仍諄飭將弁同心勉力按期認真演練以冀日有

起色隨於八月初六日會同江甯將軍臣裕瑞江

甯副都統臣穆騰額前詣五龍山沙洲圩兩處校

閱滿漢官兵施放礮位及後路接應之鳥槍擡礮

均屬聲勢聯絡具有膽氣其大江南北兩岸礮堤

兵礮臣定於八月十六日自省起程次第查閱約

須二十餘日回署所有日行事件循例委江甯藩

司傅繩勛代拆代行其題咨緊要文案仍包封途

次辦理所有校閱省標官兵及會演五龍山沙洲

圩兩處礮堤兵礮情形謹會同江甯將軍臣裕瑞
江甯副都統臣穆騰額合詞恭摺具

奏伏乞

皇上聖鑒訓示謹

奏 道光二十七年八月初六日具

奏奉

硃批知道了欽此

附奏動用息銀添廠買穀片子

再江甯省城於道光十一等年積存民捐賑餘銀
四萬六千兩發典生息

奏明專爲備荒之用嗣經前督臣陶澍復於省城設
立豐備義倉買備稻穀以濟荒歉至道光二十年
止動支典息穀石各數節經

奏報在案茲據江甯布政使傅繩勛詳稱道光二十
一年因灾動支息銀並倉貯餘稻全數動碾賑濟

嗣經陸續買補截至二十四年止共實貯稻二萬
一千九百八十一石零典息項下截至二十六年
止實存銀四千九百二十一兩零查原建倉廩三
十餘間現已貯滿此後加買穀石不敷堆貯據紳
董稟明添建倉廩四十二間廳堂住房十九間連
置買什物共用工價銀四千一百五十八兩零合
計新舊兩倉可貯穀五萬餘石請動用二十五六
兩年典息連現存銀兩乘時買穀以資儲備竝此

項動用銀穀民捐民辦應免造冊報銷由府詳司
轉請具

奏前來臣覆查無異所有動用息銀添販買穀緣由
謹會同江蘇巡撫臣陸建瀛合詞附片具陳伏乞

聖鑒謹

奏

硃批依議該部知道欽此

李文恭公奏議

卷十五

江督

五

附奏修理淮安府便民船片子

再接管卷內據江甯布政使傅繩勛調任江蘇按察使周祖植會詳稱查得淮安府塢便民船頭李文壇周印二船上屆小修均於道光十八年十月二十八日完工扣至道光二十一年十月屆應中修因軍務停緩現在久逾例限准淮楊道咨會勘驗該二船實係朽腐不堪裝運亟須修理飭取工料冊結移送到司查冊開中修船二隻每隻估需

工料銀七十九兩四錢一分二釐二船共銀一百五十八兩八錢二分四釐核與額編銀數相符照造工料冊結會詳請

奏等情移交前來臣查便民船李文壇等二船久逾中修例亟應修理相應奏懇

聖恩俯准動項興修以應差遣除俟部覆至日再將估需工料銀兩冊結咨部查核外謹附片具

奏伏乞

聖鑒謹

奏

硃批工部議奏欽此

附奏運鉛人員請借讓漕銀兩片子

再前准部咨運鉛人員實因遭風沉溺以及守壩讓漕等事請借銀兩分別

奏明酌借所借之數不得浮於應銷之數竝經江省議請按日計算如數在五百兩以內者應卽照數給領倘守候日久仍照向借章程不得逾五百兩之數其應借之銀須俟事竣方准請借等因在案茲有貴州領解丁未年上運二起京鉛委員天柱

縣知縣許樸貴州領解丁未年下運一起京鉛委
員大定府水城通判鄭鳳鳴均因行抵清河縣清
江間等處停讓重漕不容漫越更兼禦黃壩堵閉
未能前進停泊五十日及五十九日不等核計每
日食米鹽菜銀兩應領之數已在五百兩以外各
請借給讓漕銀五百兩稟由江甯布政使傅繩勛
核與部定新章相符應准借給等情詳請具

奏前來臣覆核無異除飭司在於司庫道光二十六

年雜稅款內各准借給銀五百兩催令儻運前進
竝咨黔省卽於各該員應得養廉及報銷找領銀
兩扣繳造報江省作正開銷暨咨部查照外理合
附片具

奏伏乞

皇上聖鑒謹

奏

硃批該部知道欽此

覆奏整頓營務並考察江西二鎮摺子

奏爲欽奉

諭旨先行據實縷陳容再督飭查察恭摺奏祈

聖鑒事竊臣於道光二十七年七月二十六日承准軍

機大臣字寄五月十九日奉

上諭近自海疆多事以來屢經朕再三訓諭該督等自能認真督飭實力講求斷不致仍前廢弛不知振作以目前而論東南各省夷情雖皆就範而粵東民情

浮動且華夷雜處難免忿爭設一旦激生事端所恃
以及時徵調者惟江西各營較近著李星沅接奉此
旨務就江西各營將弁加意整頓總期有勇知方共
得勁旅二三千名倘遇粵省偶有調遣無難一呼卽
至等因欽此五月二十二日奉

上諭江西九江南贛二鎮地方扼要現任總兵清保德
坤二員平日能否申明紀律俾技藝悉臻精熟操防
果否畱心設遇調遣能否得力可靠著李星沅於到

任後隨時留心察看據實具奏毋稍瞻徇等因欽此
仰見我

皇上整肅戎行遴材儲備跪誦之下欽悚曷勝伏思練
兵在精不在多徵兵宜近不宜遠粵東民夷雜處
傳聞異詞倘積忿以啟爭端惟軍威可資彈壓其
就近調遣莫如江西各營而兵力軟弱前次用之
浙東已有明驗臣時在蘇省不啻親歷行間此次
道經九江每遇營員進見輒爲講明軍律再三嚴

加告戒并函商撫臣吳文鎔先以治兵爲急查該省兵額一萬二千四百七十二名前據撫臣來咨原有挑選備戰徵兵三千四百七名復經諄切函詢及照飭兩鎮此項兵丁憑何入選如何分期演練技藝能否出色緩急能否足恃未可徒託空言至九江鎮屬十六營額兵五千六十三名贛南鎮屬十八營額兵五千四百二十四名此外省標協營額兵爲數無幾誠如

聖諭二鎮地方最爲扼要而贛南界連庾嶺緊接粵東
該鎮總兵德坤前任漢中鎮時臣以知府同城相
處逾月嗣因浙江夷警德坤領兵赴調臣復於蘇
省接晤乍浦之戰陝甘兵不避寇德坤頗以身先
向來操防亦俱勤慎無懈雖未通曉兵法尙不失
爲中材九江鎮總兵清保曾任湖北將官臣於舟
次武昌時面詢督臣裕泰據云該鎮前在崇陽軍
營甚屬出力及過九江接見察其年力方壯明晰

周爰似可望爲干城近復疊札分飭務於鎮屬各
營設法整頓認真挑備斷不准有名無實臣仍隨
時隨處留心察看從嚴督飭竝密致撫臣一體教
演查考總之將材難得節取而不可姑容簡要易
從專練而無須泛濫臣如果選士厲卒實得勁旅三
千無此置爾界之分有朝發夕至之便安民戢暴
莫切於斯臣夙昧戎機懍遵

慈訓惟有先自振作時刻講求精益求精勉之又勉誠

不敢略分畛域漠視鄰疆尤不敢稍寬責成上塵宸念所有欽奉

諭旨督飭考察緣由謹先繕摺覆

奏伏乞

皇上聖鑒謹

奏 道光二十七年八月初六日具

奏奉

硃批隨時認真查訪閱伍之時細心校閱萬一有所調

遺不能得力責有攸歸懔之毋忽欽此

附奏整頓水師片子

再江省營務近年稍覺改觀而弓力之等差鎗箭之準頭演放大礮之架式就省標而論仍未能勁悍過人將備中出色之員亦不多覩或以南方風氣柔弱爲解臣思時代不同風氣無異遠自漢晉多以江東兵雄長中原近如明臣戚繼光亦用浙江溫處兵禦倭有功南方豈盡柔弱我

國家承平日久民不知兵復以吳越秀良重文輕武

軍旅之事漸少修明幾爲當時通弊水師不振殆
又甚焉蓋內洋外海風雲沙線之辨頗少傳人舉
凡師船礮械按月巡哨向多視爲具文一有盜劫
之案輒先妄指洋圖展轉推諉卽令總兵督緝將
弁稟報出洋或某日擊碎盜船或某處轟斃盜匪
汪洋大海誰實見之雖不盡屬子虛所言殊難憑
信現當水師緝捕喫緊經臣咨會浙省相機合辦
竝與撫臣捐廉籌費遴委幹練文武水陸分投疊

札指示飭遵海峒窩頓必清海岸接濟必斷其寄
縱有所必確探以跟蹤其出沒無常必擇要以截
擊新造大舫舳板互換油艙量爲津貼加工舊設
哨弁巡丁例給口糧復爲破格懸賞摠以生擒盜
犯起獲盜贓爲憑或提訊夥黨或解驗傷兵或質
證船尸必得有所徵驗不准虛報邀功務與陸路
各營一律認真整飭破除結習以冀勉副

宸懷合再據實附陳伏乞

聖鑒訓示謹

奏

硃批另有旨欽此內閣奉

上諭李星沅奏整頓洋面捕務等語水師弁兵按月巡
哨近多視爲具文卽或出洋巡捕往往虛報邀功或
云擊碎盜船幾隻或云轟斃盜匪多名且動以人船
俱沈沒無蹤爲詞海面迷漫大抵望洋而歎從何查
驗該督嗣後總須嚴飭水陸各營將弁不分海峒海

面如有盜匪立即分投合捕四面兜拏以絕根株至
該督所稱海隅窩頓須清海岸接濟須斷以及生擒
盜犯總以起獲盜賊爲憑果能照此覈實認真辦理
何患海洋不靖但不可徒託空言鋪張過盛須於引
古證今之中漸有敕敝起衰之效朕實有厚望焉勉
之將此諭令知之欽此

附奏所轄三省七鎮才力片

再總兵責任綦重必先有勇知方而後訓將練兵
各營觀感興起臣統轄三省七鎮除江西兩鎮外

安徽壽春鎮總兵哈豐阿到任未久年已六十五
歲精力能否耐勞尙須詳加體察江南徐州鎮總
兵來英在任三年營務順平無咎無譽蘇松鎮總
兵林明瑞行伍出身略習海洋而膽識有限福山
鎮總兵孫雲鴻生長閩海人較明白而體氣不充

狼山鎮總兵皂陞本未諳習水師洋面無事尙堪
循分自守當整飭營伍之會水陸均關緊要以臣
所轄各總兵欲其決勝揆機一新壁壘臣實未之
能信然亦何敢過求但能日漸月摩徐收成效自
無庸操之太急如果因循成習闕茸自甘卽當指
名

奏參以重專閫合再密陳謹

奏

硃批各鎮若不得人卿亦勞而無益必當隨時甄覈如
有可用者何妨密奏欽此

附奏覆陳泖湖設防片子

再臣承准軍機大臣字寄奉

上諭據陸建瀛奏密勘泖湖等處設防情形先行繪具
圖說一摺著李星沅到任後會同陸建瀛再行酌度
情形悉心籌畫妥議具奏等因欽此伏查上年七月
臣在江蘇巡撫任內奉

旨飭發尙書賽尙阿侍郎周祖培原奏一件遵卽會同
前督臣璧昌確查妥議當經密勘泖湖形勢擇要

籌防并移駐員弁安設兵礮各緣由奏蒙

聖鑒在案此次江蘇撫臣陸建瀛奉

旨覆勘具

奏與前議微有異同而泖湖應防之處與章練塘應
設之防所見亦皆脗合臣愚竊以地無險易得人
自強道有弛張治兵爲急誠使我兵可用而又得
善用兵之人則固國不在山谿卽僻壤自成保障
況泖湖袤延繚曲忽深忽淺忽縱忽橫夷舶未易

長驅官兵足多疑陣非若江海設防之難然兵法
攻瑕不攻堅正恐突如其來乘間竊發且蘇垣根
本重地逼近上海尤宜先事預籌無滋異類之疑
自切同仇之備疊荷

聖明訓示洞燭幾微敢不勉致精詳再三審慎視情形
於指掌嚴保衛於腹心臣以查閱礮隄擬卽順道
至蘇面晤撫臣熟計如須再往相度亦卽不動聲
色密速一行容俟會商定議恭摺請

旨遵辦合先附陳謹

奏

硃批總期緩急可恃切忌妄作聰明掉弄筆頭終無實
濟也懍之勉之欽此

查閱江防事竣回省摺子

奏爲查閱江防事竣回省恭摺奏祈

聖鑒事竊照大江南北兩岸修建礮隄十四處均經設

礮安兵兼派後路接應本年秋季循案值臣校演

臣前在省城會同江甯將軍臣裕瑞副都統臣穆

騰額閱演五龍山沙洲圩兩處礮兵並臣出省日

期業經專摺

奏報臣卽於八月十七日行抵京口先閱南岸北固

山象山至圖山關大二磯頭及江心東生洲鷺鼻
嘴大小石灣及北岸劉聞沙八處礮隄遂就近至
蘇州與撫臣陸建瀛面商事件復由京口渡江次
閱北岸順江洲上下及三江口東岸固土洲西岸
西成洲四處礮隄竝京左右溧陽高資江陰泰興
瓜洲揚州三江等營分派各隄後路接應官兵又
揚州鹽捕營承演霍家橋續設礮隄官兵其法於
傳令時演放大小礮位礮聲一發所有護礮兵丁

各執擡礮鳥鎗突出隄後鎗礮連環施放長矛藤
牌等兵亦從後吶喊向前竝岡山關鷺鼻嘴設有
水操各駕舢板船隻點放鎗礮火箭搶過江心聲
勢頗爲聯絡步伐均尙齊整磨盤石礮架轉旋亦
甚靈便土墩土牆完固如初老洲新沙叢生蘆葦
礮隄漸多遮蔽經臣到處履勘嚴切告戒務須隨
時認真操練藝高自然膽壯適用不在美觀卽礮
子宜先合膛分袋存貯礮蓋宜常油艫分段稽查

各礮口門宜加護守備礮火藥宜令深藏官兵同聲聽受臣復就礮隄附近校閱官兵步箭中數亦過七成當經拔補記名加賞惟江陰營把總盛鳴遠年力漸衰江陰營外委吳雲達不守營規溧陽營千總李大全京口右營外委毛應高沙振斌瓜洲營外委吳受林三江營額外孫正崗等箭法欠熟卽據該管將官當場揭報分別咨革勒限勤操臣舟次揚州適聞黃水陡長順黃壩一帶頗出險

工迅至清江會晤河臣潘錫恩詢悉搶護情形各
工徐臻平穩所過河湖開壩宣洩亦皆合宜臣於
九月初八日仍回省署辦事所有查閱江防事竣
緣由理合繕摺具

奏伏乞

皇上聖鑒謹

奏
道光二十七年九月初九日具

奏奉

硃批知道了欽此

附奏周歷江防綜度全局形勢片子

再臣周歷江防綜度全局形勢從前大江筦鍵原在吳淞海口今則以江陰縣之鷺鼻嘴爲第一重門戶丹徒縣之圖山關爲第二重門戶江面至此收束寬不過五六里及八九里由圖山關而上焦山特立江心其南爲象山北固山其西金山對峙又爲京口切近門戶中間水深湍急江面寬止四五里焦山四面皆水金山亦宛在水中故未安置

兵礮江省防守最要莫先於鷺鼻嘴該處大小石灣背倚君山黃山沿江南岸設有萬斤八千斤六千斤各礮五十尊北岸劉聞沙亦設礮三十五尊隄防不爲不慎惟京口副將駐紮江陰縣城所轄京左右營分駐靖江京口江陰營兵亦無多有事猝難應敵查高資營都司額兵五百餘名本屬京口協營分駐內港僻地擬并移駐江陰或距縣城稍近容再飭查安兵處所

奏題另辦又驚鼻嘴圖山關水操船隻太少查廟灣
鹽城兩營海曲沙淤前撥和板船隻擬勘明酌撥
應用至金焦兩山現未明設兵礮有事或可暗防
攻其不備亦當預計藏兵處所原設京口水勇名
不副實已飭右營遊擊陳柏齡廣爲雇募認真教
演由臣捐給口糧隨時抽調考驗計自驚鼻嘴至
江甯省城袤延六百餘里江洲平行遼濶礮隄必
不能周且止株守一隅後路接應官兵亦僅此數

前次夷匪內犯均一面駐船開礮誘我迎敵一面
登陸抄襲奪我礮臺吳淞卽其明證值此無事之
日勢難多派重兵常川駐守節經嚴飭將備各就
現在兵礮實力講求按期操練務令礮隄十四處
一氣聯屬呼吸皆通萬一有警卽行添調外兵分
布後路隘口逐層設伏要截以防登岸繞越兵將
相顧竒正相生庶幾制敵之道謹再附陳伏乞

聖鑒訓示謹

奏

硃批知道了欽此

附奏勒休江陰營遊擊程名彪片子

再臣校閱礮隄官兵查有江陰營遊擊程名彪年力衰庸難期振作署高資營都司侯思全營制生疎亦欠穩實又臣抵任後訪聞常州營遊擊松山遇事任性不洽兵心此次舟過府城復加查察與臣所聞無異均未便畱待軍政暫予姑容相應請旨將江陰營遊擊程名彪勒令休致常州營遊擊松山署高資營都司候補都司侯思全均降爲守備歸

部另行掣省以肅營務所遺遊擊員缺容再遴選
請補理合附片陳

奏伏乞

聖鑒訓示謹

奏

硃批所奏是另有旨欽此內閣奉

上諭李星沅奏甄別游擊都司請分別勒休降補等語
江南江陰營游擊程名彪年力衰庸難期振作著卽

勒令休致常州營游擊松山著送部引見再降諭旨
署高資營都司候補都司侯思全營制生疎著降爲
守備歸部銓選該部知道欽此

遵

旨籌防泃湖再行酌度情形摺子

奏爲籌防泃湖等處遵

旨再行酌度情形會議覆

奏仰祈

聖鑒事竊臣李星沅承准軍機大臣字寄奉

上諭據陸建瀛覆奏密勘泃湖等處設防情形先行繪具圖說一摺朕詳加披覽如所議斜塘口攔路口等

處豫置已舊糧艘貯石浮艤以備臨時鑿沈遏阻夷
船來路因思此項船隻雖以無用之物爲有用之備
然各口門俱係往來出入要路無端多設糧艘待沈
不惟有事無以制寇卽平時船隻亦多窒礙是欲阻
寇而先以自阻也且移運糧艘亦易啟夷人之疑而
究之於攔阻夷船恐不足恃所議似出下策其所稱
兩岸口門用竹簍碎石鑲築裹頭及礮位無庸豫設
等議亦未周爰著李星沅到任後會同陸建瀛再行

酌度情形悉心籌畫妥議具奏將此諭令知之欽此
跪讀之餘彌深兢惕適查閱江防出省擬卽至蘇
會商當經附片陳明茲於八月二十三日行抵蘇
州面晤臣陸建瀛度全局屏除成見悉心再四
熟商復同至寶帶橋親歷湖口細察情形欽遵前
後奉到

諭旨并各圖說摺件逐層計畫務求慎密周妥扼要籌
防查黃浦江與吳淞江匯流入海本蘇州諸水之

尾間泖湖內通蘇州外接黃浦如斜塘口爲第一重要隘攔路口爲第二重要隘以地勢論擇要而守無過於此惟所以守要之法必須先事預防俾此間緩急有可恃亦須因利乘便俾他族偪處無可疑計由黃浦至泖湖斜塘口外江水寬深原無阻遏之理卽當斜塘口門朝潮夕汐大波軒然亦未易言堵禦自應於口門內由深漸淺處所酌量施工前擬竹簍裝石平時拋入鑲裹以防激水展

寬又擬浮艤糧艘臨時鑿底沈塞以防番舶突駛
究於水道疏暢不可必而於夷性疑慮不可知疊
蒙

慈訓周詳多方指示臣等懍遵密計展轉思維因泖湖
居民往來販運蘆草時用木筏過渡較爲便利擬
添購木簰數十架於斜塘口近處無事則分爲小
筏間段停泊民不病涉習以爲常有事則聯散爲
整細紮堅厚縋以大石使沈底放之平水使截流

似平時形跡泯然臨時攔阻有備而民船出入農
田宜洩皆可相安由泖湖至澱山湖是爲攔路口
水面益狹而淺且與內河密邇帆檣雲集一有警
報約中號船四五隻飛速駕往載石鑿沈夷船卽
難徑入其斜塘口外迤西一河可由浙江嘉善縣
繞出蘇州又尖灘老灘古浦野雞墩各小口儘有
船隻屆期一律趕辦無須專備糧艘惟碎石必不
可少且難立致應行先期採運原議章練塘距泖

湖僅三里擬請移駐縣丞一員守備一員外委一員額外二員兵丁一百四十名合之舊設弁兵共二百一十四員各責令巡緝偵探如邀

恩允新建衙署兵房需用碎石卽可藉此爲由分起堆貯并木簾交汛看管湖口所需千斤礮位密存守備署中相距甚近調用亦尙便捷至黃浦江兩岸如閔行鎮得勝港東汉口西汉口等處均經安設礮位提督駐劄松江自可就近防守沿海倘有不

遲必於斜塘口一帶分駐重兵以資策應而尤在
良將勁旅摩厲以須因地因時虛實兼用最爲先
務之急臣等受

恩深重斷不敢苟且張皇惟當審擇機宜整練營伍慎
謀於無事防患於未然以期仰慰

宸廑於萬一所有遵

旨再行會議緣由謹密摺覆

奏伏乞

皇上聖鑒訓示謹

奏 道光二十七年九月初九日具

奏奉

硃批軍機大臣密議具奏原摺密封發還欽此

卷之四 詩經 卷之四 詩經



卷之四

詩經

卷之四

詩經

卷之四

詩經

卷之四

詩經

卷之四

詩經

卷之四

詩經

卷之四

詩經

卷之四

詩經

卷之四

詩經

附奏奉到

硃批勉勵片子

奏再

臣

前奏泖湖設防至蘇會籌一片奉

硃批總期緩急可恃切忌妄作聰明掉弄筆頭終無實濟也懍之勉之欽此又奏飭緝洋盜一片奉

上諭該督嗣後總須嚴飭水陸各營將弁不分海隅海面如有盜匪立即分投合捕四面兜拏但不可徒託空言鋪張過盛須於引古證今之中漸有起衰救敝

之效朕實有厚望焉勉之等因欽此伏讀感激惴恐
難名竊思臣子之義積誠爲先敷奏以言功在明
試如稽鋪張失實上煩

萬幾省覽此卽覆載所不容況身任封圻事關緊要更
何敢無知妄作掉弄筆頭惟臣賦質迂庸時以負
恩溺職爲懼一切見聞施措不敢不盡情披瀝備陳

聖主之前卽如洊湖籌防無論如何布置如何堵塞全
在臨時相機調遣將士用命鼓勇爭先倘地險可

憑而人力難恃雖有粵河之鐵練寇以鋸水塗之而鐵化矣雖有鎮海之釘椿寇以木桶束之而椿拔矣至海洋緝盜經臣抵任後重懲水師詳示辦法辱焦穎禿獲犯仍未可知總由鎮將泄沓者多巡洋廢弛已久亟宜先作其氣各審所能舍舊圖新由愧生奮或可漸祛結習以臣歷任各省將才殊不易求而兵非練不行練兵非將不行是則臣所仰而思之夜以繼日者也嗣後懍遵

恩訓督飭水陸各營甄覈必嚴賞罰必信極知刻期收效非_臣力所能爲而要_臣力所當盡祇此一縷血誠務求實濟勉酬

高厚鴻慈謹附片陳

聖鑒謹

奏奉

硃批另有旨欽此

審擬迭劫案内首要各犯摺子

秦爲審明迭劫案内指引首盜脫逃復行拒斃眼線
之首要各犯分別定擬恭摺奏祈

聖鑒事竊照道光二十五年六月間據蕭縣職員段景
和以段文魁等勾結趙廷申等糾劫拒殺事王捕
役縱盜戳傷孩婦等情赴步軍統領衙門具控奏
奉

諭旨此案著交壁昌親提人證卷宗秉公嚴審按律定

擬具奏原告段景和該部照例解往備質欽此經前
督_臣壁昌飭據各州縣緝獲首夥各犯解發江甯
藩司督府訊擬詳解前督_臣壁昌審係趙廷申起
意糾夥連劫李小喜等拒傷事主段景風斃命將
已獲之趙廷申李小喜問擬斬梟先行正法周二
等分別斬遣具

奏摺內聲明已獲之姜心等護送趙廷申出境被差
圍拏拒傷各縣差役竝傷眼線李貴卽李三身死

飭令查案另行審辦准部議覆轉行遵照茲據江甯府知府徐青照查明姜心等犯事竝永城碭山等縣驗詳李貴及差役戚允修唐義等被拒受傷各案審擬解由江甯布政使傅繩勛覆審轉解前來臣親提各犯覆加研訊緣姜心卽姜良李二馬峯卽馬風張長路卽張杭臧興邦侯二徐三馬祿王書各籍隸沛縣豐縣蕭縣碭山及河南永城等縣姜心先在山東單縣行竊逞兇從重擬徒解發

臨淄縣安置脫逃復竊解發原配復逃與已死李
貴卽李三素識無嫌李三先因迭竊擬軍發配甘
肅解至碭山縣地方脫逃永城縣差唐義等因屢
緝趙廷申未獲知其與趙廷申素識雇令作線徐
三先在山東單縣犯竊杖責刺臂遞籍保束李二
係李貴胞兄與馬峯等均向未爲匪姜心等與前
獲正法之趙廷申素相交好趙廷申糾劫蕭縣事
主段景和等家夥犯拒傷段景風身死聞拏逃逸

道光二十六年六月初間趙廷申潛回原籍永城縣探聽消息現獲之臧興邦告以查拏緊急趙廷申欲圖遠避不敢獨行卽央兄臧興邦竝現獲之姜心張長路馬峯李二侯二徐三馬祿王書已故議結之馬兆昌在逃之陳廣幅縱戎侯大季七唐俊王法過趙王午馬三共十八人指引僻路護送江心等各帶器械亦有徒手於是月初四日起身初五日行至永城縣湯佛寺地方經永城縣差役

戚允修等追至姜心李二馬峯張長路護送趙廷
申先行逃脫臧興邦侯二徐三馬祿王書各自奔
散陳廣幅等落後戚允修等將其截住各被拒傷
姜心李二馬峯張長路同趙廷申於初六日行至
碭山縣定國寺地方復被碭山永城二縣差役帶
同李貴追拏趙廷申子身竄逸姜心等被差圍住
李貴用槍戳傷姜心右腮腋姜心情急圖脫用槍
嚇戳適傷李貴臍肚倒地李二馬峯張長路各用

鐵槍將差役唐義邵從謙常廷萬戳傷分頭逃逸
李貴傷重移時殞命各役報縣驗詳飭緝先後拏
獲趙廷申等各犯歸於段景和等被劫案內訊擬
具

奏准部議覆茲據查照原案審明姜心等議擬解勘
臣提犯親鞠據認前情不諱詰非有心欲殺亦無
另犯不法別案犯係先後拏獲指供如一案無疑
義查姜心護送盜犯趙廷申逃走因被差拏受傷

情急圖脫用槍戳傷李貴卽李三身死李貴雖經
縣役雇爲眼線惟本屬逃軍同係負罪之人未便
以應捕人論自應仍照凡鬪科斷姜心卽姜良除
在徒配脫逃輕罪不議外合依鬪毆殺人不問手
足他物金刃竝絞律擬絞監候秋後處決李二馬
峯卽馬風張長路卽張杭因護送趙廷申被差圍
拏各用鐵槍拒傷差役鐵槍係例禁兇器李二馬
峯張長路除知人犯罪而指引道路輕罪不議外

應於聚眾執持兇器傷人徒罪以上不分首從發
邊遠充軍例上各加拒捕罪二等俱發雲貴兩廣
極邊烟瘴充軍仍以極邊足四千里爲限照例刺
字減興邦侯二徐三馬祿王書護送趙廷申行至
中途旋即逃散不知拒捕情事均合依知人犯罪
官差追喚而引送減罪人罪一等律於趙廷申斬
罪上減一等各杖一百流三千里與李二等俱到
酌折責安置減興邦據供親老丁單是否屬實行

知犯籍照例查辦各犯逃後竝無知情容留之人
陳廣幅等將差役戚允修等拒傷現犯訊未在场
唐義等僱令李貴作線訊係不知李貴犯罪在逃
情事其被拒傷及姜心傷痕均已平復姜心徒配
逃脫王守竝非賄縱均毋庸議兇器已棄免追屍
棺飭埋逸犯陳廣幅等緝獲另結除錄供咨部竝
咨步軍統領都察院查照外所有審明定擬緣由
理合恭摺具

奏伏乞

皇上聖鑒敕部議覆施行謹

奏 道光二十七年九月初九日具

奏奉

硃批刑部議奏欽此

揀員調補南匯縣知縣摺子

奏爲揀員調補沿海要缺知縣恭摺奏祈

聖鑒事竊照南匯縣知縣蕭翀因案降調所遺南匯縣知縣係繁疲難兼三要缺該縣逼近吳淞海口商賈輻輳政務殷繁非精明幹練之員不足以資治理臣等於通省現任知縣內逐加遴選查有元和縣知縣孫琬年六十二歲山東歷城縣監生由捐納縣丞分發江蘇咨補華亭縣縣丞道光十二年

大計卓異候升因催儼回空漕船出力奉

上諭著以應升之缺儘先升用升補武進縣知縣十九
年十一月到任嗣於捐輸海疆經費案內奉

旨著賞加知州銜給予加一級二十四年

大計卓異奉准部覆調取引

見奏調今職二十六年八月初七日奉文准調臣李星
沅到任未及三月例不加考臣陸建瀛覆查該員
年力富強才具明練歷俸已滿三年以之調補南

滙縣知縣洵堪勝任雖以繁調繁與例稍有未符
惟南滙縣係海疆要缺人地實在相需例得專摺
奏請據藩司會詳前來臣等往返札商意見相同
合無仰懇

天恩俯准以元和縣知縣孫琬調補南滙縣知縣於海
疆要缺有裨該員係現任知縣請調知縣銜缺相
當毋庸送部引

見至

大計卓異一案仍另行給咨赴部任內一切因公處
分例免核計其前任華亭縣丞及武進等縣奉議
各案罰俸銀兩業據全數解清專案造冊咨銷所
遺元和縣要缺咨另遴員請調謹合詞恭摺具

奏伏乞

皇上聖鑒訓示謹

奏
道光二十七年九月十八日具

奏奉

硃批另有旨欽此內閣奉

上諭李星沅等奏請揀員調補海疆要缺知縣一摺著
照所請江蘇南匯縣知縣員缺准其以孫琬調補該
部知道欽此

附奏委署句容縣知縣片子

再請補句容縣知縣熊象鼎前經飭令先行赴任
茲准部咨以該員丁嗣父憂服滿竝無文結到部
尙未准其起復請補句容縣知縣應毋庸議等因
轉行在案所遺句容縣缺查有鹽城縣知縣楊鳳
翮堪以調署據藩臬兩司會詳前來除批飭遵照
外理合附片具

奏伏乞

聖鑒謹

奏

硃批覽欽此

附奏遵

旨買米助賑片子

再臣等承准軍機大臣字寄奉

上諭前有旨令李星沅等於江蘇安徽兩省購買糧石
運往河南接濟災區茲據王植奏稱本年安徽省亢
旱日久江北尤甚收成歉薄糧價增昂勢難接濟鄰
省等語自係實在情形惟豫省正在辦賑之時需用
孔急著李星沅陸建瀛仍遵前旨迅卽妥籌購買有

若干石先行委員飛速解往仍令後起源源接運一面奏聞以慰朕懷至王植所奏酌籌庫款解往江蘇協濟之處如不須用卽知會安徽無庸協撥庫項以免輾轉解運之煩等因欽此伏查豫省辦賑需米甚殷臣等前奉

諭旨當經飭司籌款委員上緊採買配船起運竝請將捐存米石隨同運往以濟災區恭摺

奏明在案現據委員來稟已購米四萬石運往清江

備撥仍於常州揚州各屬分投購足十萬石陸續
接運竝先期飭屬雇船應用其經由運道迭咨河
南撫臣查覆及能否雇船迎撥計日即可覆到飛
速照辦不准片刻稽延如捐米蒙

恩俯准隨運共得米十六萬石接濟民食又據豫省咨
明招商免稅似無缺米之虞所需米價運腳若干
先儘江省三庫籌墊其安徽協撥庫項已據撫臣
王植咨明籌解銀十萬兩卽遵

旨飛咨截留無庸輾轉周折如已起解來江或暫存司
庫酌量情形但可無需動用卽將原銀還皖以重
庫儲謹先附片覆

奏伏乞

皇上聖鑒謹

奏

硃批知道了欽此

奏陳酌議現辦淮南鹽務章程摺子

附清單

奏爲查明淮南鹽務酌議現辦章程恭摺奏祈

聖鑒事竊臣前因淮綱銷路未暢當合全局通籌附片

陳明奉

硃批認真妥辦欽此伏思兩淮鹺務爲

國家度支所關淮北改行票鹽著有成效淮南課額

較重銷數易虧歷年總無起色

臣甫膺

重寄考覈攸資敢不勉力承當悉心補救此次道經揚

郡與運司但明論講求體察復隨時博訪輿論詳稽案牘以期因革權衡竊惟課之來源在乎引引之去路在乎銷必有年銷年額之鹽乃有年銷年額之課如丙午等年五綱經前督臣

奏准推展減運原爲帶銷殘引查近年楚西兩岸捆運引數總在八十萬左右乃本年春秋二單截至九月共止運過三十餘萬引不及上屆運數之半正額尙多短缺殘引安望運銷且聞楚西存鹽多

至一百餘萬引在揚未運及已派未認者又多至一百六十餘萬引商本佔閣不貲後運轉輸非易此引鹽壅積之情形也至減運正項雖應照額全完而雜款分帶未免遞有延緩從前運庫實貯銀三百數十萬兩卽二十五年六月運司但明倫接收交代庫存亦幾及二百萬兩現在運庫存銀止一百數十萬兩而先後奉撥甘肅兵餉軍需均係緊款必須迅速解交此外如內務府節省銀兩并

外省鹽規匣費利息等項均各需用孔殷河南賑恤米價尤爲緊要亦須分別緩急次第籌解設再撥放滋繁庫貯卽難周轉此課項支絀之情形也揆厥所由官以畏難而因仍商以畏累而機巧成本增於雜費行銷滯於售私年復一年幾同痼疾若不於減運期內上緊設法疏通屆限斷難復額課源日塞庫藏日虛辦理從何措手茲當丁未開綱伊始先以內清場私外截鄰私爲急則治標之

計本年回空糧私業經臣奏奉

諭旨查禁其川私粵私潞私浙私亦均咨行堵緝並嚴飭各場稽查火伏收繳廢鏹不准視為具文又引船夾帶向來為害最鉅經臣專委幹員會營扼要搜查卽在揚州仙女廟報獲一起夾私至一百十五萬九千餘觔又在江甯下關報獲一起夾私至三萬二千九百餘觔均卽提省審辦他如慎出納以重庫貯提緩課以備解支派縣引則綱額悉清

刪繁文則商本暗減配運殘引可漸疏銷提售新
鹽可免停積裁浮糜巡費以備收買竈鹽禁捏報
淹消以防船戶盜賣謹酌議章程八條另繕清單
恭呈

御覽臣仍督同運司因地因時務全大局凡有裨益課
運應爲酌劑變通之處容再相機策畫分別

奏咨遵

旨認真妥辦總期治人治法相輔而行殫竭愚誠徐圖

整理仰副

聖主垂廛禹筴之至意所有查明淮南鹽務酌議籌辦
緣由理合恭摺具

奏伏乞

皇上聖鑒訓示謹

奏 道光二十七年九月十八日具

奏奉

硃批勉力爲之務期日有起色戶部議奏單併發欽此

謹將籌辦淮南鹽務分別因革事宜酌議章程八
條繕具清單恭呈

御覽

一運庫正雜商課絲毫均關要款當此慎籌

國計尤宜撙節實存嗣後額解額支應查照各藩庫
於動放時專案報明備查其無定活支等項不
分銀數多寡均查明原委按款具詳由臣核准
飭遵不得先行動放以憑斟酌刪減

一近年辦理折運收數較少放款仍多必得量入
爲出現飭運司及早預籌除運庫實存銀數之
外計今歲秋單來年春單應完商課是否足數
支解如有不敷即將節年緩課飛咨楚西鹽道
趕緊提回併本年懸引緩納課銀飭商就近在
揚完繳毋許延欠

一楚西引鹽歷派綱商認辦其有倒歇退懸之引
始准酌派招徠近口率多化名詭避辦運有一

商化作十餘名者現查丁未新綱虛懸三萬餘引又歷綱積存已派未認十四萬餘引應將捏造假名一概刪除禁止所有朦退引數均歸各本商名下認回照辦其實在無著者酌派通河各商至歷綱未認積引責令已派各商納課投請如有違混卽照商欠鹽課例從嚴追究

一淮南重運引鹽自完課請票以至鹽船開江凡管鹽各衙門給發官件如印本銀票引單底馬

梳封水程之類名目甚多需索勒捐諸弊卽由
此起大爲商運之累現與運司熟籌應裁者裁
應併者併務使刪繁就簡直捷易行一切公件
隨到隨辦毋許牽掣延阻如有胥吏把持需索
嚴提究懲

一楚西兩岸歲約銷鹽八十餘萬引而折實畱運
止六十餘萬引是運足新綱之外尙可帶銷二
十餘萬引應自丁未綱起飭令各商將額派引

數趕緊納課發重凡請運新鹽一千引配運殘
鹽三百引不得先儘殘鹽請辦其甯國上江等
食岸融楚者本係輕則之鹽運銷重課之地未
便轉爲佔壓擬俟新綱運竣再准請辦

一湖廣存鹽計引不下百萬前經

奏明以三百萬包爲一檔按到船前後逐檔售賣惟
先銷積引似與丁未新綱有礙不能不酌中通
變卽擬咨商湖廣督臣每於一檔之中將鹽船

到岸停泊兩年以外者先提一百二十萬包兩年以內者先提一百萬包新綱運到先提八十萬包仍以三百萬包爲一檔均勻派賣毋許爭先搶跌亦不准高擡價值自阻銷路

一查淮南巡費每年所需甚鉅從未得收實效今擬酌留走私各要隘照舊派巡其餘一律裁撤卽以所省經費收買竈鹽使窮丁得有口食不致偷賣濟私仍飭商酌搭捆重按引扣還接濟

至州縣營汎本有緝私之責查獲私鹽變價充賞不准因裁除巡費稍爲鬆勁如有庇縱分別參究

一鹽船淹消自道光十年奏定止准補運不准免課迨後查有行舟實係遭風失險者復經

奏明量爲矜恤近則報案疊出甚至到岸停泊亦報淹消虛捏必不能免卽就補運之數約計每年三五萬引積少成多綱引亦形佔礙嗣後停泊

鹽船呈報淹消概不准免課補運船戶盜賣之
引追贓給領亦不准免課其在大江行駛猝遇
風暴失事經地方官勘訊屬實仍隨時酌准以
示區別

恭報場屬秋收分數摺子

奏爲本年場屬秋收分數循例恭摺具奏仰祈

聖鑒事竊照兩淮通州泰州海州三分司所屬各場秋
收分數例應恭摺

奏報茲據通州分司運判趙祖玉稟報所屬豐利等
九場高低牽算約計六分有餘又據署泰州分司
運判范維璿稟報所屬富安等十一場高低牽算
約計六分又據海州分司運判洪上庠稟報所屬

板浦等三場高低牽算約計六分有餘各等情據
此_臣查通屬各場坐通州如皋東臺三州縣境內
本年夏初晴霽日冬至五月中旬始得透雨禾苗
插蒔稍遲泰屬各場坐落東臺興化鹽城阜甯四
縣境內或夏間晴亢日久或秋後雨澤過多禾草
雜糧不無受旱被淹至海屬各場坐落海州贛榆
境內池頭灘角不成頃畝所種雜糧禾稻因夏秋
晴雨失調亦多根莖受傷是以三分司所屬收成

均形歉薄由鹽運使但明倫彙核具詳前來謹循
例恭摺具

奏伏乞

皇上聖鑒謹

奏
道光二十七年九月十八日具

奏奉

硃批知道了欽此

附奏訪拿官運夾私請將運判知事撤任片子

再臣前聞淮南引船每多夾私之弊當經劄委北
監掣同知童濂鹽捕營都司宋天麒在於經由要
隘嚴密搜查茲據兩淮運司但明倫詳稱八月二
十二日訪有官運船隻夾帶私鹽在仙女廟停泊
卽飭委員查拏隨據童濂等稟報馳往會查係通
州分司趙祖玉督同試用知事顏晉敏捆運中包
官鹽船隻訊據押運差役及船戶等供詞均涉兩

歧遂親督兵役將各船押至揚州南鹽廳起出鹽
五萬七千一百八十三包內除官運二萬四千包
計獲私鹽二萬三千一百八十三包船戶葛長富
等二十五名一併拏獲攬頭婁鑑聞風潛逃該分
司等是否知情故縱通同買帶由司詳請分別撤
任撤委解省審辦等情前來臣查趙祖玉等督捆
官鹽雇船裝運出場中有夾帶何至毫無覺察乃
竟多出中包二萬三千餘包以每包五十觔計算

至一百十五萬九千餘觔之多爲從來所未有亟
應澈底究追以期水落石出除勒緝攬頭婁鑑剋
期務獲外相應請

旨將通州分司運判趙祖玉卽行撤任試用知事顏晉
敏暫行革職飭提船戶人等解省委員確切研訊
根究鹽觔來歷儻有通同故縱及藉官行私等弊
另行據實嚴參斷不敢稍任狡飾理合附片具
奏伏乞

聖鑒訓示謹

奏 道光二十七年九月十八日附

奏奉

硃批必當從嚴查辦另有旨欽此內閣奉

上諭李星沅奏拏獲引船夾帶私鹽請將運判等分別
撤任革職究辦等語江南通州分司運判趙祖玉試
用知事顏晉敏督捆官鹽雇船裝運出場經委員查
出私鹽一百十五萬九千餘斤之多實從來所未有

藉官行私通同故縱非從嚴查辦何以懲私蠹而儆
官邪趙祖玉著卽行撤任顏晉敝著暫行革職均交
該督提同船戶人等確切研訊根究鹽斤來厯按律
從嚴懲辦至攬頭婁鑑雖已潛逃不難弋獲務將確
情訊出毋任狡飾推卸倘有知情故縱情節卽行據
實嚴參該部知道欽此

甄劾河工人員摺子

奏爲據實甄劾河工人員以資儆戒恭摺奏祈

聖鑒事竊惟河工與地方相表裏利害所關甚鉅大要
務在得人臣李星沅身任地方不敢稍存歧視於
河工道廳將備隨時悉心確訪前次奏報出省校
閱江防聲明順道清江察看奉

硃批是欽此卽經舟次清江以所訪各員優劣面晤臣

潘錫恩互加考證意見均屬相同查有海安通判

馬廷樑年少虛華不務上進揚河通判孫乃坤辦
工不力習氣已深均應請

旨卽行革職蕭南同知孫鑾甫經由繁調簡而輕浮自
喜仍於輿論未孚邳北通判金洪人尙明晰而意
存見小修防每形竭蹶均應請

旨改歸地方以府經歷縣丞降補又河營參將李勝人
未馴謹聲名平常海安守備陳耀邳北守備周宜
高堰守備韋大旺狃於積習不知勤慎自愛均應

請

旨卽行革職臣等爲整飭河員慎重地方起見謹合詞

據實

奏參伏乞

皇上聖鑒訓示謹

奏 道光二十七年九月十八日具

奏奉

硃批所奏甚是另有旨片留中欽此內閣奉

上諭李星沅等奏甄劾河工人員一摺所奏甚是海安
通判馬廷樑年少虛華不務上進揚河通判孫乃坤
辦工不力習氣已深河營參將李勝人未馴謹聲名
平常海安守備陳耀邳北守備周宜高堰守備韋大
旺狃於積習不知自愛均著卽行革職蕭南同知孫
鑾輕浮自喜輿論未孚邳北通判金洪意存見小修
防竭蹶均著改歸地方以府經歷縣丞降補該部知
道欽此

海安通判揚河通判蕭南同知邳北通判河營參
將海安守備邳北守備高堰守備等處均奉

硃點

請

旨卽行革職一處并以府經歷縣丞降補處均奉
硃橫

附奏河工情形請將淮揚徐州兩道對調片子

奏再河工習尚浮侈牢不可破久在

聖明洞燭之中每有子弟隨宦其父兄卽爲指捐遇缺
儘先幾同世職并有父子同時爲河廳者又有工
次商賈開店牟利子弟卽就近補官者流品不齊
別爲風氣所由來者漸矣現任河臣潘錫恩精研
河務動合機宜實能加意整頓亦藉廉幹道員隨
同考察清釐查現任徐州道查文經精明廉潔守

正不阿頗爲河員所敬畏惟駐劄徐州府與清江較遠如蒙

簡調淮揚道常在河臣左右當收臂指之用所遺徐州道缺查新任淮揚道韓椿由京員學習有年才具謹飭修防諳練以之調署徐州道亦堪勝任是否有當敢再密陳伏乞

聖鑒留中謹

奏